

Llythyr agored at drigolion, busnesau a phartneriaid ledled Bwrdeistref Sirol Caerffili:



Annwyl bawb,

Mae'n wythnos ers cyflwyno ein cyfyngiadau coronafeirws lleol, felly, roedden ni o'r farn y byddai'n adeg briodol i ysgrifennu atoch chi, gan roi gwybodaeth am y sefyllfa ddiweddaraf.

Yn gyntaf oll, hoffen ni ddiolch i bob un ohonoch chi am eich ymdrechion parhaus i helpu rheoli lledaeniad y feirws marwol hwn. Nid oedd yr un ohonon ni eisiau i'r cyfyngiadau hyn gael eu gorfodi ar ein bywydau pob dydd, ond bu'n wych gweld cydnerthedd ac awydd penderfynol y gymuned.

Mae trwch y boblogaeth yn y Fwrdeistref Sirol yn cydweithredu â'r rheolau, ac rydyn ni'n gweld llawer o gydymffurfio o ran defnyddio masgiau wyneb, cadw pellter cymdeithasol, cadw at y cyfyngiadau teithio, a'r protocolau Profi, Orlhain a Diogelu.

Mae ein partneriaid yn Heddlu Gwent hefyd yn rhoi'r un darlun cadarnhaol ar y cyfan ledled y Fwrdeistref Sirol. Mae ein timau gorfodi ein hunain wedi bod yn gweithio'n agos gyda siopau, tafarndai, archfarchnadoedd a mangreoedd eraill i sicrhau bod pawb yn ymwybodol o'u rhwymedigaethau. Rydyn ni'n gweithio'n galed i helpu ac annog y gymuned fusnes leol, ond mae'n bwysig nodi bod hefyd gennym ni bwerau gorfodi, os oes angen.

Rydyn ni'n gwybod bod y sefyllfa yn yr ysgolion yn peri pryder i lawer o deuluoedd. Gallwch chi fod yn sicr bod protocolau a chynlluniau cadarn ar waith i ymateb i unrhyw achos wedi'i gadarnhau yn yr ysgolion. Iechyd, diogelwch a lles y plant yw ein prif flaenoriaeth, ac mae popeth posibl yn cael ei wneud i'w diogelu nhw yn yr ysgol.

Cafodd cyfleusterau profi dros dro eu sefydlu yn Ystrad Mynach a Chaerffili yn ystod yr wythnosau diwethaf. Mae'r rhain bellach yn cael eu datgomisiynu ar ôl cyflawni eu pwrpas. Roedd y rhain yn ddarpariaeth dros dro i'n helpu ni i ddeall ac olrhain lledaeniad coronafeirws yn y gymuned. Drwy'r canolfannau profi lleol hyn rydyn ni wedi profi llawer o bobl, ond mae'r niferoedd hyn bellach wedi gostwng yn sylweddol. Mae canolfan brofi arall bellach wedi'i darparu yn Nhredeggar Newydd am wythnos ar gyfer cymunedau yng ngogledd y Fwrdeistref Sirol. Wedi hynny, bydd y gorsafoedd profi niferus ledled y rhanbarth ar gael i'r rhai sydd angen prawf.

Mae hi braidd yn gynnar i benderfynu a yw ein gweithredoedd ar y cyd wedi lleihau lledaeniad y feirws. Mae'r ffigurau'n cael eu monitro'n ddyddiol, ond ni fyddwn ni'n gweld effaith yr ymyriadau am o leiaf 3 wythnos. Bryd hynny, byddwn ni'n adolygu'r sefyllfa yn ffurfiol ar y cyd â Llywodraeth Cymru.

Mae'r Cyngor wedi parhau i weithio'n ddiflino ers cyhoeddi'r cyfyngiadau symud cychwynnol ym mis Mawrth. Rydyn ni wedi ail-lunio ac ad-drefnu ein gwasanaethau er mwyn ymateb i'r pandemig, gan barhau i helpu'r bobl fwyaf agored i niwed yn ein cymunedau. Mae ein staff a'n cynghorwyr lleol wedi bod yn anhygoel, a diolch o galon iddyn nhw am eu proffesiynoldeb a'u hymroddiad parhaus.

Mae ein neges ni wrth symud ymlaen yn un syml – mae eich ymateb chi hyd yn hyn wedi bod yn syfrdanol, ond daliwch ati i weithio gyda ni gan nad ydyn ni eto allan o berygl!

Drwy weithio gyda'n gilydd, gyda phob un ohonon ni'n gwneud ein rhan, gallwn ni – a byddwn ni – yn brwydro yn erbyn lledaeniad y feirws ofnadwy hwn.



**Y Cynghorydd
Philippa Marsden
Arweinydd y Cyngor**



**Christina Harrhy
Prif Weithredwr**